



Laerskool GERICKE Primary

Owenstraat 37 | Ceres | 6835
Telnr.: 023-312 1110 | E-pos: admin.gericke@lando.co.za
Webwerf: <http://lsgericke.com>



TOELATINGSBELEID

(Beleid van Laerskool Gericke rakende die toelating van leerders tot die skool of grade by die skool)

Hersien: Mei 2024

1. DOEL

Aangesien Laerskool Gericke (hierna “die Skool”) 'n openbare skool is met regs persoonlikheid ingevolge die bepalings van artikel 15 van die Suid-Afrikaanse Skolewet, Nr. 84 van 1996 (soos gewysig) (hierna “die Skolewet”) waarvan die beheer aan sy skoolbeheerliggaam (hierna “die SBL”), soos in artikel 16 van die Skolewet, toevertrou is;

Aangesien die SBL ingevolge artikel 5 van die Skolewet by magte is om onderhewig aan die bepalings van die Skolewet en enige toepaslike provinsiale wet, die Skool se beleid rakende die toelating van leerders tot die Skool en grade by die Skool te bepaal;

Aangesien die SBL met betrekking tot die kwessie van leerdertoelating tot die Skool of verskillende grade by die Skool op die volgende wetgewing (hierna “die wetgewing”) let:

- 1.1 die Grondwet van die Republiek van Suid-Afrika 1996 (hierna “die Grondwet”);
- 1.2 die Suid Afrikaanse Skolewet, Nr. 84 van 1996 (soos gewysig) (hierna “die Skolewet”);
- 1.3 artikel 3(4)(i) en 5 van die Wet op Nasionale Onderwysbeleid, Nr. 27 van 1996 (“NEPA”);
- 1.4 die Toelatingsbeleid vir Gewone Openbare Skole, deur die Minister van Onderwys in Staatskoerant Nr. 19377 van 19 Oktober 1998 (Kennisgewing Nr. 2432/98) (hierna “ministeriële beleid”) gepubliseer; en
- 1.5 toepaslike provinsiale wetgewing.

Aangesien die Skool en sy SBL die betrokke bepalings van die wetgewing raadpleeg in soverre dit vir hulle geld en bindend is en voorrang geniet bo die mag van die SBL om die Skool se toelatingsbeleid te bepaal, en terselfdertyd vasbeslote is om die volle toepassing van die Skool se toelatingsbeleid binne die perke van die wetgewing en van tyd tot tyd enige ander toepaslike wetgewing, te verseker;

Daarom verklaar die SBL namens die Skool nou die Skool se Beleid vir die Toelating van Leerders tot die Skool of Verskillende Grade by die Skool soos volg:



Laerskool GERICKE Primary

Owenstraat 37 | Ceres | 6835

Telnr.: 023-312 1110 | Faksnr.: 023-316 1924

E-pos: admin.gericke@lando.co.za | Webwerf: <http://lsgericke.com>



2. AANSOEKE OM TOELATING TOT DIE SKOOL

2.1 Daar word erken dat:

2.1.1 die Departementshoof (Onderwys) (hierna "DH") en/of amptenare van die departement van onderwys (DVO), insluitende die Prinsipaal, wat deur die DH gedelegeer is (hierna "die DH-gedelegeerde(s)"), vir die administrasie van leerdertoelating tot die Skool verantwoordelik is; en

2.1.2 die DH/die DH-gedelegeerde(s) 'n registrasieproses vir toelating tot openbare skole moet bepaal sodat leerdertoelating op 'n tydige en doeltreffende wyse plaasvind.

2.2 Daar word beklemtoon dat die DH/die DH-gedelegeerde(s)/die Prinsipaal hierdie beleid te alle tye sigbaar, billik en ingevolge die wet in aanmerking moet neem tydens optrede ooreenkomstig paragraaf 1.1 hierbo of die beslissingsproses rakende toelatingsaansoeke. Die Skool en sy SBL sal ook van die DH/die DH-gedelegeerde(s)/die Prinsipaal verwag om te alle redelike tye volle toegang tot en afskrifte van enige registers of lêers wat as deel van die toelatingsproses gehou word te verkry.

2.3 Die Skool en die SBL sal van die DH/die DH-gedelegeerde(s)/die Prinsipaal verwag om die inligtingsbylae vir beheerliggaamdoeleindes (hierby aangeheg) by die voorgeskrewe aansoekvorm in te sluit en die voltooiing daarvan deur die aansoeker te verseker.

2.4 Die Skool en die SBL sal van die DH/die DH-gedelegeerde(s)/die Prinsipaal verwag om te verseker dat aansoekers van die volgende in kennis gestel word en ook skriftelik bevestig dat hulle dit gelees het en begryp:

2.4.1 die SBL-grondwet;

2.4.2 die Taalbeleid;

2.4.3 die Godsdiensbeleid;

2.4.4 die Gedragskode vir Leerders; en

2.4.5 hierdie Toelatingsbeleid.

2.5 Die Skool en die SBL onderskryf die siening dat ingevolge die reg en by gebrek aan 'n hofbevel tot die teendeel, die wettige Ouer(s)/voog(de) van 'n minderjarige leerder die uitsluitlike reg het om te besluit by watter skool hulle kind/pleegkind ingeskryf word. Gevolglik aanvaar die Skool en SBL geen aansoek tensy dit ingedien word deur die



Laerskool GERICKE Primary

Owenstraat 37 | Ceres | 6835

Telnr.: 023-312 1110 | Faksnr.: 023-316 1924

E-pos: admin.gericke@lando.co.za | Webwerf: <http://lsgericke.com>



ouer(s)/voog(de) van, of die persoon/persone met wettige aanspraak op sorg vir die minderjarige leerder, of 'n persoon/persone wat skriftelik deur hulle daartoe gemagtig word nie. Voorts beskou die Skool en die SBL nougesette nakoming van hierdie benadering as noodsaaklik aangesien dit verseker dat geldige toestemming verleen word vir die behandeling van die leerder *in loco parentis*, vir die leerder se deelname aan uitstappies, ensovoorts. Gevolglik word daar van die DH/die DH-gedelegeerde(s)/die Prinsipaal verwag om te verseker dat hierdie benadering streng nagekom word.

- 2.6 Die SBL onderneem om die DH/die DH-gedelegeerde(s)/die Prinsipaal in pogings te ondersteun om die persone waarna daar in paragraaf 1.5 hierbo verwys word aan te moedig om voor die einde van die jaar wat die volgende skooljaar voorafgaan, om die toelating van hulle kinders/pleegkinders aansoek te doen.
- 2.7 Onderhewig aan hierdie beleid vereis die SBL dat die DH/die DH-gedelegeerde(s)/die Prinsipaal leerdertoegang tot openbare skole, waaronder dié Skool, in oorleg met die Skool koördineer, en onderneem die SBL om opbouende ondersteuning te verleen ten einde te verseker dat alle geskikte leerders toepaslik toelating ontvang.
- 2.8 As 'n voorvereiste vir enige besluit rakende die toelating van 'n leerder tot die Skool, vereis die Skool en die SBL dat die DH/die DH-gedelegeerde(s)/die Prinsipaal die volgende bepaling van die Grondwet streng nakom:

“28 (2) – 'n Kind se beste belang is van deurslaggewende belang in elke aangeleentheid wat die kind raak”.

3. DIE SKOOL SE GEDRAGSKODE VIR LEERDERS (INSLUITEND DRAGKODE)

Hoewel aansoekers se weiering om die Skool se Gedragskode vir Leerders (insluitend dragkode) te onderskryf nie die toelating van die leerder tot die Skool kan verhoed nie, sal die kode nietemin bindend wees vir die leerder. Artikel 8(4) van die Skolewet bepaal soos volg:

Geen bepaling van hierdie Wet stel 'n leerder vry van die verpligting om die gedragskode van die skool wat deur sodanige leerder bygewoon word, na te kom nie.”

Getroue skoolbywoning, selfdisipline ten opsigte van akademie, stiptelikheid en deelname aan minstens een somer en een winter sportsoort asook aan ander buitemuurse aktiwiteite word van elke leerder verwag.



Laerskool GERICKE Primary

Owenstraat 37 | Ceres | 6835

Telnr.: 023-312 1110 | Faksnr.: 023-316 1924

E-pos: admin.gericke@lando.co.za | Webwerf: <http://lsgericke.com>



Aanzoekers word aangemoedig om die Skool te ondersteun deur hulleself van die Skool se Gedragskode vir Leerders te vergewis en die nakoming daarvan deur leerders te verseker.

4. SKOOLGELD

4.1 Ouers (soos in artikel 1 van die Skolewet omskryf) se versuim, weiering of onvermoë om skoolgeld te betaal, kan nie die toelating van leerders tot die Skool verhoed nie.

'n Leerder word toegelaat tot die totale skoolprogram en mag nie geskors word van klasse, toegang tot kultuur-; sport- en sosiale aktiwiteite geweier word, 'n skoolrapport of oorplasingstifikaat geweier word of andersins geviktimizeer word op grond daarvan dat sy/haar ouers:

4.1.1 nie instaat is (nie *kan*) om skoolgeld te betaal nie;

4.1.2 nie die missiestelling en gedragskode van die skool steun nie;

4.1.3 geweier het om 'n kontrak aan te gaan ingevolge waarvan die ouers afstand doen van enige eis om skadevergoeding wat voortvloei uit die opvoeding van die leerder.

4.2 Ingevolge artikel 38-41 van die Skolewet, moet 'n begrotingsvergadering van die ouers van ingeskrewe leerders by die Skool na dertig (30) dae kennisgewing aan ouers geskied. By hierdie vergadering besluit die meerderheid van die ouers teenwoordig op die aanvaarding al dan nie van die begroting wat vir die volgende boekjaar deur die SBL voorberei is. By dieselfde vergadering kan die meerderheid van stemgeregtigde ouers teenwoordig besluit dat die betaling van skoolgeld verpligtend moet wees, wat die skoolgeldbedrag per leerder per jaar sal wees, en watter maatstawwe sal geld vir algehele of gedeeltelike vrystelling aan ouers wat nie die volle verpligte bedrag of 'n gedeelte daarvan kan betaal nie. Ouers wat nie daartoe in staat is om enige gedeelte van die bedrag of die volle bedrag te betaal nie, is daarop geregtig om op die voorgeskrewe vorms by die SBL om algehele of gedeeltelike vrystelling van die betaling van skoolgeld aansoek te doen. Sodanige aansoeke moet vertroulik deur die SBL hanteer word. Die SBL sal billik optree en bogenoemde maatstawwe asook die bepalinge van die ministeriële beleid en die Regulasies vir die Vrystelling van Ouers van die Betaling van Skoolgeld in Openbare Skole (Goewermentskennisgewing R1052) toepas. 'n Afskrif van laasgenoemde sal op versoek aan ouers beskikbaar gestel word. Ouers wat om vrystelling aansoek doen, kan 'n opvoeder by die Skool of enige ander persoon vir bystand met die aansoek nader. 'n Ouer/ouers wat deur die SBL se besluit



Laerskool GERICKE Primary

Owenstraat 37 | Ceres | 6835

Telnr.: 023-312 1110 | Faksnr.: 023-316 1924

E-pos: admin.gericke@lando.co.za | Webwerf: <http://lsgericke.com>



verontreg voel, kan ingevolge die prosedure wat in genoemde regulasies uiteengesit word, by die DH appelleer.

- 4.3 Aansoekers om vrystelling moet egter daarop let dat die gekombineerde jaarlikse inkomste van ouers in berekening gebring word in die besluit of ouers vir vrystelling in aanmerking kom al dan nie. Ouers is *afsonderlik en gesamentlik* verantwoordelik om skoolfonds te betaal. “Gekombineerde jaarlikse bruto inkomste van ouers” word in regulasie 1 van voorgenoemde regulasies omskryf as:
“die saamgetelde bruto inkomste van al die ouers van 'n leerder soos in die Wet omskryf...”.

- 4.4 Die Skolewet omskryf “ouer” soos volg:

4.4.1 die biologiese of aanneem-ouer of wettige voog van 'n leerder;

4.4.2 die persoon met wettige aanspraak op sorg vir 'n leerder; of

4.4.3 die persoon wat onderneem om die verpligtinge van 'n persoon in paragrawe (a) en (b) ten opsigte van die leerder se opvoeding op skool na te kom.

Dus indien die leerder byvoorbeeld 'n pa én 'n ma het, maar by sy/haar tante woon, met ander woorde 'n persoon na wie daar in (c) hierbo verwys word, sal die gekombineerde bruto inkomste (vóór belasting of aftrekkings) van al drie – d.w.s. die ma, pa én tante – in berekening gebring word wanneer daar oor algehele of gedeeltelike vrystelling van die betaling van skoolgeld beslis word.

- 4.5 Om hierdie rede moet die besonderhede van alle persone wat onder die omskrywing van “ouer” val, in die toelatingsaansoek aan die Skool verskaf word.

- 4.6 Die aansoeker se aandag word voorts op die volgende bepaling van die Skolewet gevestig:

(Artikel 41) – “Die beheerliggaam van 'n openbare skool kan die betaling van skoolgelde deur ouers wat daarvoor aanspreeklik is..., deur regsproses afdwing.”

- 4.7 Ouers van leerders word aangemoedig om die hoë onderrigstandaard en die goeie skoolfasiliteite en -omgewing in stand te hou deur skoolgeld te betaal en, waar hulle algehele of gedeeltelike vrystelling van die betaling van verpligte skoolgeld ontvang, hulle dienste tot voordeel van die Skool aan die SBL beskikbaar te stel.



Laerskool GERICKE Primary

Owenstraat 37 | Ceres | 6835

Telnr.: 023-312 1110 | Faksnr.: 023-316 1924

E-pos: admin.gericke@lando.co.za | Webwerf: <http://lsgericke.com>



5. VEREISTE DOKUMENTE VIR TOELATING

'n Ouer moet op die WKOD se aanlynplatform (<https://wcedonline.westerncape.gov.za/admissions>) aansoek doen vir toelating tot die skool. Geen ander metode van aansoek doen is toelaatbaar nie. 'n *Inligtingsdokument* sal deur die prinsipaal aan hom/haar beskikbaar uitgereik word.

Tesame met die aansoekvorm moet die ouer 'n amptelike geboortesertifikaat van die leerder aan die prinsipaal toon. Indien die ouer nie 'n geboortesertifikaat kan toon nie, kan die leerder voorwaardelik toegelaat word totdat 'n afskrif van die sertifikaat van die streekskantoor van die Departement van Binnelandse Sake verkry is. Die prinsipaal moet die ouers inlig dat dit 'n misdryf is om 'n valse verklaring oor die ouderdom van die leerder te maak. Die ouer moet verseker dat die toelating van die leerder binne drie maande ná die voorwaardelike toelating afgehandel word.

By aansoek om toelating moet die ouer bewys lewer dat die leerder teen die volgende siektes ingeënt is: polio, masels, tuberkulose, witseerkeel, klem-in-die-kaak en hepatitis B.

Wanneer 'n leerder van een openbare skool na 'n ander verskuif, moet die prinsipaal 'n oorplasingkaart voltooi en dit hetsy aan die ouer oorhandig of na die ander skool aanstuur.

Sien aanhangsel A by hierdie beleid vir 'n volledige lys van vereiste dokumente vir toelating.

6. LEERDEROUDERDOMSVEREISTES VIR TOELATING TOT DIE SKOOL OF VERSKILLENDE GRADE VAN DIE SKOOL

'n Leerder wat met meer as twee jaar buite die ouderdomsnorm val, sal nie vir toelating oorweeg word nie. Die ouderdomsnorme is as volg:

- Graad R – leerder word 6 in dié jaar.
- Graad 1 – leerder word 7 in dié jaar.

7. TYDPERK VIR REGISTRASIE

- 7.1 Aansoek om toelating begin in Februarie en sluit aan die einde van November met betrekking tot die inskrywing van leerders vir die volgende jaar, of soos bepaal deur die WKOD.



Laerskool GERICKE Primary

Owenstraat 37 | Ceres | 6835

Telnr.: 023-312 1110 | Faksnr.: 023-316 1924

E-pos: admin.gericke@lando.co.za | Webwerf: <http://lsgericke.com>



- 7.2 Ouers wat dus hulle kinders die eerste keer by die Skool wil inskryf, moet die leerder by die Skool registreer in die jaar voor die skooljaar waarop die leerder se aansoek om toelating betrekking het.
- 7.3 Alle aansoeke om toelating tot die skool moet aanlyn geskied deur middel van die WKOD se skakel (<https://wcedonline.westerncape.gov.za/admissions>). Ondersteunende dokumente sal, deur middel van die *Inligtingsdokument*, versoek word. Aansoeke van leerders om toelating, sal oorweeg word na 'n persoonlike onderhoud met die leerder en sy ouers deur die Skoolhoof en/of die Beheerliggaam.
- 7.4 'n Hoë standaard van onderrig, sportafrigting en kultuurbedrywighede, word in Laerskool Gericke gehandhaaf. Dit word van leerders verwag om in te skakel by die skool se huidige standaard van onderrig en buite-kurrikulêre bedrywighede.
- 7.5 Die ouers van die leerder sal binne 'n redelike tydperk, of binne die tydperk wat die DH bepaal, skriftelik van die aanvaarding of afwysing van hulle aansoek in kennis gestel word / die WKOD sal die ouer(s) elektronies inlig.
- 7.6 Alle onsuksesvolle aansoekers kan dan op die waglys geplaas word en word aangeraai om by ander skole, buiten Laerskool Gericke, aansoek te doen.

8. APPÈLPROSEDURE

Indien 'n ouer ontevrede is met die Skool se besluit om nie 'n leerder tot die Skool toe te laat nie, kan sodanige ouer ingevolge artikel 5(6) van die Skolewet by die Lid van die Uitvoerende Raad teen die besluit appelleer.

9. KAPASITEIT

9.1 Die SBL het die Skool se maksimum kapasiteit vir leerdertoelating soos volg bepaal:

9.1.1 Totale getal leerders in Skool: 660

9.1.2 Per klas:

- 25 leerders vir grade R tot 3
- 30 leerders vir grade 4 tot 7

9.2 Die volgende faktore is by die bepaling van die Skool se kapasiteit in ag geneem:

9.2.1 Dat die leerder se belange voorkeur geniet;



Laerskool GERICKE Primary

Owenstraat 37 | Ceres | 6835

Telnr.: 023-312 1110 | Faksnr.: 023-316 1924

E-pos: admin.gericke@lando.co.za | Webwerf: <http://lsgericke.com>



- 9.2.2 Die aantal beskikbare opvoeders;
- 9.2.3 Die beskikbare ruimte vir administratiewe behoeftes;
- 9.2.4 Die beskikbare aantal geskikte klaskamers;
- 9.2.5 Die behoefte aan ruimte vir sport-, kultuur- en ontspanningsaktiwiteite;
- 9.2.6 Die beskikbare ruimte in die bestaande media- en rekenaarsentrums, wetenskap- en tegnologielaboratoriums en die skoolsaal;
- 9.2.7 Die beskikbare sanitêre geriewe;
- 9.2.8 Parkeergeriewe;
- 9.2.9 Veiligheidsmaatreëls;
- 9.2.10 Die maksimum toelaatbare getal leerders per klas;
- 9.2.11 Internasionaal erkende beste praktyk met betrekking tot klasgroottes ten einde doelmatige en doeltreffende onderrig van gehalte te lewer.

10. SKOOLEIENDOM

Aansoekers se aandag word op die volgende gevestig:

- 10.1 Elke leerder by 'n openbare skool sal goed omsien na die eiendom van die skool wat tot sy/haar beskikking gestel word, en sal dit voor of op die datum wat deur enige opvoeder by die skool aangedui word, aan die skool terugbesorg.
- 10.2 Die ouers van 'n leerder by 'n openbare skool sal aanspreeklik wees vir enige skade aan of verlies van skool eiendom waarvoor die betrokke leerder op sy/haar beurt teenoor die skool aanspreeklik is.
- 10.3 Dit is elke ouer se plig om die Staat en die beheerliggaam van 'n skool in die bevordering van 'n kultuur van respek vir skool eiendom by te staan.



Laerskool GERICKE Primary

Owenstraat 37 | Ceres | 6835

Telnr.: 023-312 1110 | Faksnr.: 023-316 1924

E-pos: admin.gericke@lando.co.za | Webwerf: <http://lsgericke.com>



11. RISIKO VAN SKADE OF VERLIES

Aansoekers word daarop gewys dat die Skool geen aanspreeklikheid aanvaar vir skade aan, die vernietiging of verlies van enige eiendom wat deur die leerder of sy/haar ouer(s) op die skoolperseel gebring word nie, ongeag wie sodanige skade, vernietiging of verlies veroorsaak, hoe dit veroorsaak word, of dit deur iemand se optrede of versuim veroorsaak word, en of dit opsetlik of weens nalatigheid veroorsaak word. Die Skool aanvaar geen aanspreeklikheid nie. Leerders word aangemoedig om na enige eiendom wat op die Skoolperseel gebring word om te sien, en aansoekers en ouers van leerders word aangemoedig om self die nodige versekering teen sodanige skade, vernietiging of verlies uit te neem.

12. VOLGORDE VAN VOORKEUR MET BETREKKING TOT TOELATINGSAAANSOEKE

ALGEMEEN:

Die toelatingsproses sal op die volgende tye plaasvind:

In die eerste kwartaal – soos bepaal deur die WKOD (Graad 1).

In die derde kwartaal – soos bepaal deur die WKOD (Graad R). Aansoeke word deurlopend op CEMIS gelaai.

Na elke proses sal die betrokke ouers aanlyn, ingelig word.

- 12.1 Tensy en totdat die DH in oorleg met die SBL anders besluit, is die natuurlike voedingsgebied van die Skool Ceres, Wolseley, Tulbagh en omliggende plase.
- 12.2 Die Skool is 'n Dubbelmedium-instelling en beskik dus oor menslike hulpbronne wat hoofsaaklik voorsiening maak vir daardie leerders wie se moedertaal of gekose onderrigtaal die onderrigtaal van die Skool is.
- 12.3 Aangesien die Skool en die SBL weet dat hulle nie onregverdig teen 'n leerder mag diskrimineer namens wie 'n toelatingsaansoek ingedien word nie, en dus geensins voornemens is om te diskrimineer nie, en hoewel hulle graag hulle deel tot leerderonderrig in vennootskap met die Staat wil bydra, begryp hulle dat die Skool nie alle leerders kan inneem nie en dat een of ander vorm van (billike) diskriminasie rakende leerdertoelating onvermydelik is. Daarom en in die lig van voorgenoemde, is dit die Skool se beleid dat aansoeke in die volgende volgorde van voorkeur hanteer word:



Laerskool GERICKE Primary

Owenstraat 37 | Ceres | 6835

Telnr.: 023-312 1110 | Faksnr.: 023-316 1924

E-pos: admin.gericke@lando.co.za | Webwerf: <http://lsgericke.com>



- 12.3.1 Eerstens, aansoeke namens leerders wat *bona fide* (werklik) saam met hulle ouers (soos in die Skolewet omskryf) binne die natuurlike voedingsgebied van die Skool woon, en wie se moedertaal die onderrigtaal van die Skool is.
- 12.3.2 Tweedens, aansoeke namens leerders wie se ouer(s) werklik by 'n adres binne die natuurlike voedingsgebied van die Skool in diens is, en wie se moedertaal die onderrigtaal van die Skool is.
- 12.3.3 Derdens, aansoeke namens leerders wat *bona fide* (werklik) saam met hulle ouers (soos in die Skolewet omskryf) binne die natuurlike voedingsgebied van die Skool woon, en wie se gekose onderrigtaal (welke keuse deur die ouer(s) op die toelatingsaansoek aangedui word) die onderrigtaal van die Skool is.
- 12.3.4 Vierdens, aansoeke namens leerders wie se ouer(s) werklik by 'n adres binne die natuurlike voedingsgebied van die Skool in diens is, en wie se gekose onderrigtaal (welke keuse deur die ouer(s) op die toelatingsaansoek aangedui word) die onderrigtaal van die Skool is.
- 12.3.5 Vyfdens, aansoeke namens leerders wat buite die natuurlike voedingsgebied van die Skool woon, wie se moedertaal die onderrigtaal van die Skool is, en wat 'n vak/vakke wil neem wat deur die Skool en nie deur 'n ander skool nader aan die leerder se woonplek aangebied word nie.
- 12.3.6 Sisdens, aansoeke namens leerders wat buite die natuurlike voedingsgebied van die Skool woon, wie se gekose onderrigtaal (welke keuse deur die ouer(s) op die aansoekvorm aangedui word) die onderrigtaal van die Skool is, en wat graag 'n vak/vakke wil neem wat deur die Skool en nie deur 'n ander skool nader aan die leerder se woonplek aangebied word nie.
- 12.3.7 Laastens, aansoeke namens leerders wat buite die natuurlike voedingsgebied van die Skool woon en wie se moedertaal of gekose onderrigtaal die onderrigtaal van die Skool is, op 'n eerste-kom, eerste- keuse-grondslag.

Nieteenstaande voorgenoemde en in oorleg met die distriksdirekteur, mag die SBL, maar is nie verplig om voorkeur te gee aan broers of susters van leerders wat reeds by die Skool ingeskryf is - steeds volgens die voorkeuorde. Kinders van personeel werksaam by Laerskool Gericke kry voorkeur bo alle ander kriteria.



Laerskool GERICKE Primary

Owenstraat 37 | Ceres | 6835

Telnr.: 023-312 1110 | Faksnr.: 023-316 1924

E-pos: admin.gericke@lando.co.za | Webwerf: <http://lsgericke.com>



13. VEREISTES

Buiten waar die bepalings daarvan nie in die beste belang van 'n leerder of ander leerders is nie, sal die SBL en die Skool die SASW raadpleeg. Leerders moet onafhanklik kan funksioneer ten opsigte van toiletbesoeke en die verrig van klaswerk. Die SBL mag die ouers versoek om 'n emosionele gereedheidstoets te ondergaan.

14. TOELATING VAN PERSONE SONDER SUID-AFRIKAANSE BURGERSKAP

Aansoeke om toelating van persone sonder Suid-Afrikaanse burgerskap sal hanteer word ooreenkomstig die SASW.

15. DIE SBL EN DIE LEERDERS VAN DIE SKOOL

15.1 Daar sal van alle leerders verwag word om hulle pligte na te kom. Opvoeding in die skool is ingestel op die behou van hoë Christelike en morele waardes en die waardering van kultuurgoedere. Hoewel die lewensopvatting waarbinne die onderrig en interaksie in die skool plaasvind, Christelik gefundeerd is, sal daar onder geen omstandighede teen 'n kind as gevolg van sy godsdiens gediskrimineer word nie. Leerders is voorts daarop geregtig om hulle regte uit te oefen en op die handhawing van hulle regte aan te dring.

15.2 Die SBL beskou homself gebonde tot die beskerming van die opvoeders, leerders, ouers en nie-opvoeders van die Skool teen liggaamlike of geestelike geweld in soverre die SBL by magte is daartoe, en voorts tot die koestering van die liggaamlike, geestelike en morele welsyn van leerders. Vir hierdie doeleinde:

15.2.1 behou die SBL die reg voor om die dissiplinêre en gedragsrekord van enige voornemende leerder by die Skool te bestudeer, en alle stappe binne sy mag te doen om die toelating van 'n leerder te verhoed wie se gedrag juis daardie beste belange kan bedreig wat die SBL genoep voel om te beskerm;

15.2.2 mag die SBL die DH om inligting vra en met hom/haar in geding tree oor die wysheid van die toelating van 'n leerder tot enige graad by die Skool wanneer sodanige leerder ernstig benadeel sal word deur sy/haar onvermoë om op die vereiste vlak vir behoorlike onderrig in daardie graad te kommunikeer of mee gekommunikeer te word;

15.2.3 mag die SBL, gegewe die hulpbronne en omstandighede van die Skool, enige redelik uitvoerbare stappe doen om 'n gestremde voornemende leerder in die Skool te laat aanpas; en



Laerskool GERICKE Primary

Owenstraat 37 | Ceres | 6835

Telnr.: 023-312 1110 | Faksnr.: 023-316 1924

E-pos: admin.gericke@lando.co.za | Webwerf: <http://lsgericke.com>



15.2.4 verwag die SBL dat personeellede, leerders of ouers enige saak by hom sal aanmeld met betrekking tot die misbruik van regte of inbraak op die belange wat die SBL juis wil beskerm.

16. DIE OUERS EN DIE SKOOL/SBL

- 16.1 Ouers van leerders word versoek om die voorgeskrewe toestemmingsvorm in te vul ten einde die Skoolpersoneel daartoe in staat te stel om in noodgevalle in die beste belang van die leerder op te tree of die leerder se pyn of ongemak te verlig totdat die ouer(s) kan ingryp.
- 16.2 Buiten hulle pligte, het ouers van leerders by die Skool ook verskeie regte. Ouers het onder andere die reg om geraadpleeg te word rakende die formulering van die Skool se taal- en godsdienstebeleid en gedragkode, of enige wysigings daaraan. Hulle word ook genooi om aanbevelings en voorstelle rakende die aanvulling of wysiging van bestaande beleid of die bestaande gedragkode ter oorweging by die SBL in te dien.
- 16.3 Ouers word aangemoedig om by al die werksaamhede van die Skool betrokke te raak, aan te bied om lede te word van die beheerstrukture en ondersteuningsgroepe wat die belange van die Skoolgemeenskap dien, en die onderrigproses te ondersteun deur opbouend met opvoeders om te gaan en te verseker dat leerders opgelegde take en huiswerk pligsgetrou en nougeset doen. Daar word voorts van ouers verwag om te verseker dat hulle kinders behoorlik toegerus is om ten volle aan die onderrigproses deel te neem en dat hulle skool stip op tyd en gereeld bywoon.

17. WYSIGING

Hierdie beleid mag van tyd tot tyd deur die SBL gewysig, aangevul, verander of aangepas word.



Laerskool GERICKE Primary

Owenstraat 37 | Ceres | 6835

Telnr.: 023-312 1110 | Faksnr.: 023-316 1924

E-pos: admin.gericke@lando.co.za | Webwerf: <http://lsgericke.com>



Aanhangsel A

Vereiste inligting vir beheerliggaamdoeleindes bo en behalwe die besonderhede wat ingevolge ministeriële beleid, provinsiale beleid of wette verstrek moet word:

1. Die naam, woonadres, werkadres en alle telefoon-, of e-posbesonderhede van elke persoon wat onder die omskrywing van “ouer” in die Skolewet val;
2. 'n Gewaarmerkte afskrif van enige hofbevel of enige testamentêre geskrif wat voogskap of wettige aanspraak op sorg, of enige soortgelyke reg van die persoon (“ouer”) wat daarop aanspraak maak, bevestig;
3. 'n Beëdigde verklaring, werkgewersertifikaat, elektrisiteitsrekening of enige ander bewys wat redelikerwys deur die SBL vereis mag word om 'n leerder en sy/haar “ouers” se woonplek, of die feit en plek van indiensneming van die leerder se “ouers” te verifieer;
4. 'n Afskrif van 'n identiteits- of ander dokument wat die identiteit van elke persoon wat onder die omskrywing van “ouer” in die Skolewet val, tot die redelike bevrediging van die SBL bevestig;
5. Skriftelike magtiging deur die ouer(s)/voog(de)/persoon na wie in punt 2 verwys word, aan enige persoon om hom/haar/hulle in die aansoek om toelating van die leerder tot die Skool of in enige ander aangeleentheid met betrekking tot die leerder te verteenwoordig;
6. Die onderrigtaal wat namens die voornemende leerder gekies word;
7. Besonderhede van enige aanmeldbare siekte waaraan die leerder (moontlik) ly;
8. Besonderhede van enige ernstige oortreding waaraan die leerder deur 'n hof of enige skool waar die leerder voorheen ingeskryf was, skuldig bevind is;
9. 'n Voltooide gedragssertifikaat van die skool waar die leerder tans ingeskryf is;
10. Besonderhede van enige toestand van die leerder wat die liggaamlike welsyn van enige ander leerder of personeellid van die Skool kan raak;
11. Besonderhede van enige *bepaalde behoeftes* wat die leerder mag hê en wat mag aandag verg om die leerder se skoolervaring te maksimaliseer of sy/haar beste belange te bevorder;



Laerskool GERICKE Primary

Owenstraat 37 | Ceres | 6835

Telnr.: 023-312 1110 | Faksnr.: 023-316 1924

E-pos: admin.gericke@lando.co.za | Webwerf: <http://lsgericke.com>



12. Besonderhede van enige *toestand of omstandighede* waarvan die Skool bewus behoort te wees ten einde die beste belange van die leerder en/of enige ander leerders van die Skool te beskerm;
13. Enige bepaalde vakke wat die leerder graag wil studeer en wat nie deur 'n skool nader aan die leerder se woonplek aangebied word nie.



Laerskool GERICKE Primary



Owenstraat 37 | Ceres | 6835

Telnr.: 023-312 1110 | Faksnr.: 023-316 1924

E-pos: admin.gericke@lando.co.za | Webwerf: <http://lsgericke.com>

Hersien en goedgekeur op hierdie _____ dag van 04/06 2024

Handtekeninge:

Voorsitter: P. Morkel

T. Du Toit

J. Rabe

E. Laubscher

J. Redelinghuys

N. Karsten

M. Von Bentheim

L. Meyer

S. Gelders (skoolhoof)

Kringkantoor: Kring 5 (Kaapse Wynland):

J. Harker